



Broj: 01-50-1-15-35/08
Sarajevo, 8. 10. 2008. godine

ZAPISNIK

35. sjednice Predstavničkog doma
Parlamentarne skupštine Bosne i Hercegovine,
održane 24. septembra i 7. i 8. oktobra 2008. godine

Sjednica je, 24. septembra 2008., počela u 10 sati. Prisustvovalo je 35 poslanika. Odsustvo su opravdali: Sead Jamakosmanović, Zlatko Lagumdžija, Vinko Zorić, Rifat Dolić, Lazar Prodanović, Savo Erić i Remzija Kadrić.

Iz Vijeća ministara BiH sjednici su prisustvovali ministri Sredoje Nović i Tarik Sadović, te zamjenik ministra Srđan Arnaut.

Sjednici je prisustvovala i predstavnica Regulatorne agencije za komunikacije BiH – u ime predlagača rang-liste za imenovanje člana Upravnog odbora Javnog RTV servisa BiH.

Iz međunarodnih organizacija prisustvovali su predstavnici: OHR-a, OSCE-a, američke ambasade, kao i nevladine organizacije Centara civilnih inicijativa.

U okviru prethodnog pitanja, predsjedavajući Doma Niko Lozančić informirao je poslanike o prijedlozima za dopunu dnevnog reda 34. sjednice, koji tada nisu dobili entitetsku većinu, pa su bili predmet usaglašavanja u Kolegiju kao komisiji. Radi se o sljedećim prijedlozima:

- Prijedlog Kluba poslanika HDZ-a BiH da se u dnevni red 34. sjednice uvrsti prijedlog zaključka u vezi s preispitivanjem odluke Centralne izborne komisije BiH o registraciji birača za lokalne izbore;

- Inicijativa poslanika Adema Huskića sa 34. sjednice Doma da se na jednoj od narednih sjednica Doma raspravlja o pitanju imovine Bosne i Hercegovine;

- Prijedlog Denisa Bećirovića da se u dnevni red 34. sjednice Doma uvrsti prijedlog zaključaka predloženih na 10. zajedničkoj sjednici Doma naroda i Predstavničkog doma povodom rasprave o sadržaju Sporazuma o stabilizaciji i pridruživanju.

Obavijestio je Dom da je u Kolegiju postignuta saglasnost o tim prijedlozima te su time i usvojeni. U vezi s tim rekao je kako smatra da nema smisla odgađanje usaglašavanja o prijedlozima za dopunu dnevnog reda, već da to treba uraditi odmah na samoj sjednici, što će Kolegij ubuduće i nastojati.

Također u okviru prethodnog pitanja, predsjedavajući je iznio tumačenje Poslovnika Predstavničkog doma u vezi s provođenjem procedure za:

1. Prijedlog zakona o dopunama Zakona o izmirenju obveza po osnovu računa stare devizne štednje, predlagač: Vijeće ministara BiH;
2. Prijedlog zakona o izmjenama i dopunama Zakona o izmirenju obveza po osnovu računa stare devizne štednje, predlagač: poslanik Jerko Ivanković Lijanović;
3. Prijedlog zakona o zaštiti domaće proizvodnje, predlagač: poslanik Jerko Ivanković Lijanović.

Treće prethodno pitanje o kojem je predsjedavajući obavijestio Dom jeste zaključak Grupe prijateljstva za Sjevernu i Južnu Ameriku, Australiju, Okeaniju i Japan, koji je usvojila na sjednici održanoj 23. septembra 2008., kojim poziva Vijeće ministara BiH da urgentno, u skladu s materijalno-finansijskim mogućnostima, uputi pomoć u hrani, robi, lijekovima i drugim materijalno-tehničkim sredstvima za Republiku Kubu povodom nesreće koja ih je zadesila tokom septembra ove godine, kada su njihovu zemlju opustošili uragani koji su im uzrokovali veliku materijalnu štetu.

Predsjedavajući je obavijestio Dom da je Kolegij Doma dao podršku zaključku Grupe prijateljstva.

I posljednje, četvrto prethodno pitanje, jeste da je predsjedavajući informirao Dom da je poslanik Rifat Dolić obavijestio Kolegij da je istupio iz Narodnog kluba, te sada u Domu ima sedam klubova poslanika.

Nakon prethodnih pitanja, predsjedavajući je dao uvodne napomene u vezi s prijedlogom dnevnog reda, u kojima je obrazložio napravljene izmjene u odnosu na prijedlog dnevnog reda koji su poslanici dobili u pozivu za sjednicu.

U raspravi o prijedlogu dnevnog reda **Bakir Izetbegović** iznio je prijedlog da se dnevni red dopuni tačkom koja bi se odnosila na aktuelne malverzacije vezane za izdavanje lažnih ličnih dokumenata, pa je konkretno predložio da se iza prijedloga zakona, tj. iza tačke 11., uvrsti tačka koja glasi: „Prijedlog zaključka – zadužuje se Vijeće ministara BiH da u roku od sedam dana sačini informaciju o aktuelnim malverzacijama vezanim za izdavanje lažnih dokumenata u općinama Brčko, Šekovići, Srebrenica, Bijeljina itd.“

Slavko Matić izrazio je zadovoljstvo činjenicom da je Kolegij postigao saglasnost o njegovom prijedlogu za dopunu dnevnog reda 34. sjednice, pa je obnovio taj svoj prijedlog i za ovu sjednicu predložio da se u dnevni red uvrsti Informacija Centralne izborne komisije BiH o pripremama za provođenje Lokalnih izbora. Dodao je da zaključak koji je u ime Kluba poslanika HDZ-a na 34. sjednici predložio može biti jedan od zaključaka koji bi mogao nastati u raspravi o ovoj informaciji.

Denis Bećirović predložio je da se kao 12. tačka u dnevni red uvrsti Informacija o hapšenju državljanina BiH Muhameda Brkića.

Milica Marković predložila je da se kao 17. tačka u dnevni red uvrsti Razmatranje zaključaka Komisije za saobraćaj i komunikacije povodom rasprave o tački „Aktuelna situacija u RTVBiH“, vođene na sjednici Komisije 23. septembra 2008.

Jerko Ivanković Lijanović pitao je zašto u dnevni red ove sjednice nije uvršten Prijedlog zakona o zaštiti domaće proizvodnje.

Drago Kalabić predložio je da se u dnevni red uvrsti Prijedlog deklaracije o odgovornosti. Podsjetio je da je u februaru 2008. godine Klub poslanika SNSD-a predložio ovu deklaraciju, na koju do danas nije dostavljena nijedna primjedba, pa da zato predlaže da se uvrsti u dnevni red ove sjednice.

Povodom prijedloga dnevnog reda, kao i prijedloga za dopunu dnevnog reda, u raspravi i replikama učestvovali su: Sadik Ahmetović, Bakir Izetbegović, Drago Kalabić, Azra Hadžiahmetović, Milica Marković, Husein Nanić, Selim Bešlić, Branko Dokić, Beriz Belkić, Denis Bećirović, Slavko Jovičić, Jerko Ivanković Lijanović, Jozo Križanović, Momčilo Novaković, Slavko Matić, Mirko Okolić i Milorad Živković.

Poslije rasprave, predsjedavajući Doma dao je pauzu od pola sata i pozvao članove Proširenog kolegija na sjednicu.

Nakon pauze, predsjedavajući je informirao Dom da je u pauzi održana sjednica Kolegija u proširenom sastavu u namjeri da se pokuša postići saglasnost o predloženim dopunama dnevnog reda. Rekao je da nije postignuta saglasnost te da će se o svim prijedlozima glasati u skladu s Poslovníkom.

Zatim je provedeno glasanje. Nijedan prijedlog nije usvojen. Rezultati glasanja su sljedeći:

- **Prijedlog Bakira Izetbegovića:** "za" 17 (Federacija BiH 17, iz RS-a nije bilo glasova "za"), "protiv" je glasalo devet poslanika,

Poslije usaglašavanja, u drugom krugu iz RS-a je "protiv" prijedloga glasalo 10 poslanika, što je 2/3 iz entiteta;

- **Prijedlog Slavka Matića:** "za" 20 (svi iz Federacije BiH), "protiv" 10. Nakon usaglašavanja, u drugom krugu iz RS-a je glasalo "protiv" također 10 poslanika, što je 2/3 iz entiteta.

- **Prijedlog Denisa Bećirovića:** "za" 21 (Federacija BiH 20, RS jedan), "protiv" devet, "suzdržan" jedan. U drugom krugu, poslije usaglašavanja, iz RS-a je "protiv" glasalo 10 poslanika.

- **Prijedlog Milice Marković:** "za" glasalo 11, "protiv" 18, "suzdržana" dva.

- **Prijedlog Drage Kalabića:** "za" glasalo 11, "protiv" 17, "suzdržana" tri.

Predsjedavajući Lozančić konstatirao je da 35. sjednica Predstavničkog doma ima sljedeći

DNEVNI RED

1. Usvajanje Zapisnika 34. sjednice Predstavničkog doma;
2. Poslanička pitanja i odgovori;
3. Zahtjev Komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga zakona o izmjenama i dopunama Zakona o zaštiti prava pripadnika nacionalnih manjina po hitnom postupku, u skladu s članom 127. Poslovnika;
4. Zahtjev Komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga odluke o izmjenama i dopunama Odluke o osnivanju Vijeća nacionalnih manjina BiH po hitnom postupku, u skladu s članom 127. Poslovnika;
5. Prijedlog zakona o programu zaštite svjedoka u Bosni i Hercegovini (prvo čitanje);
6. Prijedlog zakona o genetski modificiranim organizmima (prvo čitanje);
7. Prijedlog zakona o Agenciji za razvoj informacionog društva BiH (prvo čitanje);
8. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (prvo čitanje);
9. Prijedlog zakona o izmjeni Zakona o klasifikaciji djelatnosti u BiH (prvo čitanje);
10. Prijedlog zakona o izmjenama Zakona o krivičnom postupku BiH, predlagač: Ustavnopravna komisija (prvo čitanje);
11. Prijedlog zakona o izmjenama i dopunama Izbornog zakona BiH, s Mišljenjem Ustavnopravne komisije, predlagač: poslanik Jerko Ivanković Lijanović;
12. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008.;
13. Godišnji izvještaj o napretku (praćenje provođenja Akcionog plana 1 Strategije reforme javne uprave u Bosni i Hercegovini, materijal Vijeća ministara BiH);
14. Prijedlog zaključaka s 10. plenarne sjednice oba doma Parlamentarne skupštine BiH, održane 30.7.2008., u vezi s realizacijom obaveza iz Sporazumaa o stabilizaciji i pridruživanju;
15. Razmatranje mogućnosti za nastavljanje procedure za imenovanje ombudsmena za ljudska prava Bosne i Hercegovine i zamjenika generalnog revizora iz bošnjačkog naroda;
16. Imenovanje člana Upravnog odbora Javnog radiotelevizijskog servisa BiH iz reda ostalih (rang-lista Regulatorne agencije za komunikacije BiH);
17. Davanje saglasnosti za ratifikaciju:
 - a. Sporazumaa između Bosne i Hercegovine i Kraljevine Danske o olakšicama kod izdavanja viza,
 - b. Sporazuma između Bosne i Hercegovine i Kraljevine Norveške o olakšicama kod izdavanja viza,
 - c. Sporazuma između Bosne i Hercegovine, koju predstavlja Ministarstvo civilnih poslova BiH i Komonvelta Australije, koju predstavlja Ministarstvo zdravlja, vezano za određena prava korištenja AR-DRG sistema klasifikacije,
 - d. Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske za 2007. godinu na osnovu instrumenta za pretpristupnu pomoć – Komponenta II prekogranična saradnja,
 - e. Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije za 2007. godinu na osnovu instrumenta za pretpristupnu pomoć – Komponenta II prekogranična saradnja,
 - f. Sporazuma o finansiranju između Bosne i Hercegovine i Komisije Evropskih zajednica u vezi s nacionalnim programom za 2007. godinu u sklopu instrumenta za pretpristupnu pomoć – Komponenta za pomoć u tranziciji i izgradnji institucija,
 - g. Konvencije o dostavljanju u inozemstvo akata u građanskim i trgovačkim stvarima, Hag 15. novembra 1965.godine,

- h. Konvencije o pribavljanju u inozemstvu dokaza u građanskim i trgovačkim stvarima, Hag 18. marta 1970. godine,
- i. Sporazuma o izmjenama i dopunama broj 1. na Ugovor o zajmu od 1. augusta 2006. između BiH i Evropske banke za obnovu i razvoj – Projekat upravljanja zračnim saobraćajem,
- j. Sporazuma o zajmu, finansiranju i projektu između KfW Frankfurt na Majni i Bosne i Hercegovine, Federacije BiH i Elektroprivrede Hrvatske zajednice Herceg-Bosne (EP HZB) – Obnova Hidroelektrane Rama.

Ad. 1. Usvajanje Zapisnika 34. sjednice Predstavničkog doma

Nije bilo rasprave o ovoj tački dnevnog reda.

Prilikom glasanja Zapisnik je usvojen jednoglasno, sa 32 glasa "za" (22 iz Federacije BiH, 10 iz Republike Srpske).

Ad. 2. Poslanička pitanja i odgovori

Predsjedavajući Lozančić konstatirao je da su odgovore na pitanja do ove sjednice dobili poslanici:

- Sadik Bahtić – od Vijeća ministara BiH, na pitanje postavljeno na 28. sjednici;
- Slavko Jovičić - od Vijeća ministara BiH, na dva pitanja postavljena na 32. sjednici;
- Rifat Dolić - od Vijeća ministara BiH, na pitanje postavljeno na 32. sjednici;
- Sadik Bahtić - od Vijeća ministara BiH, na pitanja postavljena na 32. i 33. sjednici Doma.

Odgovore na pitanja komentirali su Sadik Bahtić i Slavko Jovičić.

Denis Bećirović izrazio je nezadovoljstvo što nije dobio odgovor. Rekao je da je prije gotovo godinu dana podnio inicijativu Domu da se usvoji strategija borbe protiv korupcije i da je Dom podržao tu inicijativu i zadužio Vijeće ministara BiH da u roku od tri mjeseca dostavi Strategiju, ali na usvojenu inicijativu Doma i na tri puta postavljeno poslaničko pitanje nema nikakvog odgovora, rekao je Denis Bećirović izražavajući nezadovoljstvo što nije dostavljena spomenuta strategija.

Nova pitanja na ovoj sjednici postavili su poslanici kako slijedi:

Slavko Jovičić:

Izražavajući nezadovoljstvo odgovorima na pitanja koja je dobio od Vijeća ministara BiH, kazavši da će insistirati na adekvatnom odgovoru, ponovio je pitanja koja je postavio na 32. sjednici, a koja glase:

1. „Kada će se ispoštovati Odluka o konstitutivnosti naroda i ravnopravnoj zastupljenosti?

2. „Kada će se početi vraćati imovina Srpske pravoslavne crkve u Sarajevu?“

Milorad Živković:

„Pitanje upućujem Ministarstvu vanjskih poslova BiH i Ministarstvu vanjske trgovine i ekonomskih odnosa BiH: Da li je Bosna i Hercegovina potpisala i ratificirala „ATA KARNET“ sporazum? Ako nije, u kojoj je fazi i kada će biti potpisan?“

Klub poslanika SDA, Klub poslanika HDZ-a, Klub poslanika SBiH, Klub poslanika SDP-a i Klub poslanika HDZ '90:

Podnijeli su **inicijativu** da se provjere činjenice u vezi s indicijama da je velikom broju bh. građana uskraćeno pravo glasa na predstojećim lokalnim izborima, naročito u općinama bosanske Posavine, te da je uz pomoć aktuelnih malverzacija vezanih za izdavanje lažnih ličnih dokumenata u Brčkom i općinama Podrinja određenom broju građana iz susjednih zemalja, na protuzakonit način, omogućeno biračko pravo.

Azra Hadžiahmetović:

„Postavljam pitanje Ministarstvu civilnih poslova BiH:

Kada će uraditi podzakonske akte - Pravilnik o korištenju akademskih titula i sticanju naučnih i stručnih zvanja na visokoškolskim ustanovama i Pravilnik o sadržaju javnih isprava koje izdaju visokoškolske ustanove, što im je i obaveza čime će riješiti problem akademskih zvanja u BiH, harmonizacije akademskog prostora i ispunjavanja obaveza koje smo preuzeli potpisivanjem Bolonjske deklaracije?“

„I drugo pitanje, u ime Kluba poslanika Stranke za BiH, upućeno je Upravnom odboru Javnog RTV sistema, da nam odgovori: Kojeg dana, mjeseca i godine će konačno biti provedeni zakoni koje je Parlamentarna skupština BiH usvojila prije nekoliko godina?“

Mirko Okolić:

„Bosna i Hercegovina je potpisivanjem Sporazuma o stabilizaciji i pridruživanju između Evropskih zajednica i njenih država članica preuzela i ispunjavanje određenih obaveza. Među tim obavezama je i obaveza iz oblasti ekologije. S obzirom da je stanje u oblasti ekologije u BiH gotovo katastrofalno, te da su prema procjenama potrebni milioni konvertibilnih maraka i godine vremena samo da se očiste i dovedu red i zadovoljavajuće stanje javne površine kao što su npr. korita rijeka, potoka, jezera, mora, njihove obale, deponije smeća, putni pojasevi, parking mjesta kraj tih putnih pojaseva i ostalo, kružni pravci, neosigurana izletišta, prirodne i vještačke jame, eksploatacione zone kamena itd. **Tražim odgovor od Vijeća ministara BiH - šta je do sada urađeno na ovu temu, njihova procjena o trenutnom stanju, te procjena kada će se ova oblast urediti prema evropskim i svjetskim standardima**, odnosno tako da našim građanima bude ljepše i zdravije u njihovoj sredini i na našoj sredini, odnosno da se ne stidimo sami pred sobom i gostima iz drugih država i da s ponosom pokažemo naše prirodne ljepote koje su zaista izdašne, ali koje mi naročito u posljednje vrijeme zloupotrebljavamo?“

Husein Nanić:

1. Prema saznanjima koja imam a i prema nekim izjavama, ne postoji zakonska ni bilo kakva druga obaveza da ti novootvoreni strani tržišni centri nude određeni postotak proizvoda proizvedenih u BiH u svojoj prodaji. Pored toga, bh. kompanije imaju problem da svoj proizvod plasiraju u tim centrima. Postavljam pitanje ministru vanjske trgovine i ekonomskih odnosa BiH: Šta ste do sada preduzeli i šta planirate uraditi kako bi strani trgovački centri morali imati određeni postotak proizvoda proizvedenih u BiH?“

2. „Predsjedništvo BiH donijelo je Odluku o osnivanju tri bosanskohercegovačka informativno-kulturna centra u inozemstvu, od čega je prijedlog da se dva osnuju u Evropi a jedan u SAD-u. Postavljam pitanje ministru vanjskih poslova BiH: Šta ste uradili i šta planirate uraditi kako bi se provela Odluka Predsjedništva BiH o osnivanju bosanskohercegovačkih informativno-kulturnih centara?“

Branko Dokić:

1. „Ja također imam dva pitanja. Jedno pitanje upućeno je Vijeću ministara BiH. Šta će Vijeće ministara BiH preduzeti u vezi s najnovijim zbivanjima u i oko elektroprijenosa BiH?“

2. Drugo pitanje upućeno je Vijeću ministara BiH i visokom predstavniku Miroslavu Lajčaku. Šta će Vijeće ministara BiH i visoki predstavnik Miroslav Lajčak preduzeti da se oštetni zahtjev porodice Starovlah konačno riješi diplomatskim putem između BiH i snaga NATO-a?“

Denis Bećirović:

1. „Imam jedno konkretno pitanje za Regulatornu agenciju za komunikacije BiH. Naime, koje konkretne mjere (sankcije) će preduzeti Regulatorna agencija za komunikacije BiH protiv onih TV stanica u BiH koje u svojim centralnim dnevnicima, u onom dijelu koji je predviđen za vremensku prognozu, prikazuju entitetske granice kao državne?“

2. Drugo pitanje postavljam ministru za ljudska prava i izbjeglice BiH i ministru pravde BiH - koji su razlozi i ko je odgovoran u BiH za hapšenje državljanina BiH Muhameda Brkića?“

3. I treće pitanje, obnavljam četvrti put u Predstavničkom domu Parlamentarne skupštine BiH, a vezano je za dostavljanje teksta Strategije borbe protiv korupcije u BiH. Ponovo ga postavljam Vijeću ministara BiH i predsjedavajućem Vijeću ministara BiH gospodinu Špiriću.“

Slavko Matić:

„Poslaničko pitanje upućeno je Regulatornoj agenciji za komunikacije BiH i veoma je kratko. Na osnovu kojih propisa i iz kojih razloga se blokira i gasi signal drugog programa Hrvatske televizije unutar kablovskih TV mreža u BiH, a u vrijeme prijenosa sportskih događaja ove TV kuće?“

Šemsudin Mehmedović:

„Imam jedno kratko pitanje Vijeću ministara BiH, odnosno Ministarstvu civilnih poslova BiH. Ono glasi: Koliko je do sada državljana Srbije i Hrvatske ostvarilo dvojno državljanstvo u BiH i koliko je građana BiH do sada ostvarilo dvojno državljanstvo u Srbiji i Hrvatskoj?“

Sadik Bahtić:

„1. Ja sam već kazao, uvijek ću, pa onda, uvijek je na drugi način – Kada će Vijeće ministara BiH ovom parlamentu predložiti zakon o državnoj imovini u kojem bi bile sve nekretnine u državnom vlasništvu, te, u skladu sa zaključkom ovog parlamenta, osnovati komisiju da se popiše i zakonskim putem oduzme imovina bivšeg Saveza komunista koju je SDP uzurpirao, opljačkao i nezakonito je koristi od 1990. godine, na osnovu čega ostvaruje velik prihod?

2. Drugo pitanje: Kada će Vijeće ministara BiH donijeti podzakonske akte kojima će se regulirati novčana naknada zaposlenih u institucijama BiH?

3. Tražim od Vijeća ministara BiH odgovor i sve dokumente koji se odnose na izručenje i slučaj "Alžirske grupe".

Niko Lozančić:

„Želim postaviti pitanje Centralnoj izbornoj komisiji BiH – Hoće li na regularnost predstojećeg izbornog procesa za predstojeće lokalne izbore uticati činjenica da je Centralna izborna komisija BiH odbila registrirati preko osam hiljada državljana BiH koji se nalaze izvan BiH, te hoće li na regularnost izbora uticati činjenica, ova medijska informacija da je u jednom broju općina BiH kod izdavanja lažnih CIPS dokumenata omogućeno upisivanje u biračke spiskove za više hiljada onih koji nisu državljanici BiH?

I potpitanje ovom pitanju – Šta Centralna izborna komisija BiH, ukoliko ima iste ove informacije, namjerava preduzeti kako bi se osigurala puna regularnost predstojećeg izbornog procesa?“

Momčilo Novaković:

„Moje pitanje upućeno je Vijeću ministara BiH. Tokom TV prijenosa košarkaške utakmice BiH – Izrael na semaforu je pisalo Bosna – Izrael. U to smo se mogli uvjeriti znači gledajući taj prijenos na Javnom servisu BHT-a. Zanima me, dakle, ko je odgovoran za krivu upotrebu naziva BiH?“

Ad. 3. Zahtjev Komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga zakona o izmjenama i dopunama Zakona o zaštiti prava pripadnika nacionalnih manjina po hitnom postupku, u skladu s članom 127. Poslovnika

Predsjedavajući Lozančić dao je kratke uvodne napomene o ovoj tački.

Nije bilo rasprave.

Prilikom glasanja Dom je usvojio zahtjev za hitni postupak – “za” glasalo 30 (Federacija BiH 22, RS osam), “suzdržana” su bila dva poslanika.

Poslije usvajanja zahtjeva, usvojen je Zakon o izmjenama i dopunama Zakona o zaštiti prava pripadnika nacionalnih manjina – sa 30 glasova ‘‘za’’ (Federacija BiH 21, RS devet) i jednim ‘‘suzdržanim’’ glasom.

Ad. 4. Zahtjev Komisije za ljudska prava, prava djeteta, mlade, imigraciju, izbjeglice, azil i etiku za razmatranje Prijedloga odluke o izmjenama i dopunama Odluke o osnivanju Vijeća nacionalnih manjina BiH po hitnom postupku, u skladu s članom 127. Poslovnika

Također nije bilo rasprave poslije uvodnih napomena predsjedavajućeg.

Sa 31 glasom ‘‘za’’ (Federacija BiH 23, RS osam) i dva ‘‘suzdržana’’, usvojen je zahtjev za hitni postupak. Nakon toga je, sa 31 glasom ‘‘za’’ (Federacija BiH 23, RS osam) i dva ‘‘suzdržana’’, usvojena je Odluka o izmjenama i dopunama Odluke o osnivanju Vijeća nacionalnih manjina BiH.

Ad. 5. Prijedlog zakona o programu zaštite svjedoka u Bosni i Hercegovini (prvo čitanje)

Poslije uvodnih napomena predsjedavajućeg Lozančića, u raspravi su učestvovali: Milorad Živković, Beriz Belkić, Drago Kalabić, Šefik Džaferović, Jerko Ivanković Lijanović, Momčilo Novaković i Slavko Jovičić. U ime predlagača Zakona, govorio je Damir Veljo, šef Odsjeka za suzbijanje organiziranog kriminala.

U raspravi je izraženo nezadovoljstvo što sjednici ne prisustvuje ovlaštenu predstavnik predlagača, pa je predsjedavajući na glasanje dao pitanje – da li će Dom nastaviti raspravu o prijedlogu zakona bez prisustva ovlaštenog predlagača.

Sa šest glasova ‘‘za’’ i 20 ‘‘protiv’’, Dom je odlučio da se ne raspravlja dalje o Prijedlogu zakona iz ove tačke, nego da se rasprava nastavi kada sjednici bude prisustvovao ovlaštenu predstavnik predlagača.

Rasprava o ovom zakonskom prijedlogu nastavljena je na nastavku sjednice, 7. oktobra 2008., nakon završetka rasprave o 8. tački, u prisustvu ministra sigurnosti BiH Tarika Sadovića.

Ministar Sadović podnio je Domu obrazloženje prijedloga zakona.

U raspravi su učestvovali: Milorad Živković, Šefik Džaferović, Adem Huskić, Bakir Izetbegović, Drago Kalabić, Slavko Jovičić, Niko Lozančić, Selim Bešlić, Ekrem Ajanović, Husein Nanić, kao i ministar Tarik Sadović.

Poslije rasprave, provedeno je glasanje o Prijedlogu zakona. ‘‘Za’’ su glasala 24 (iz Federacije BiH 22, iz RS dva), ‘‘protiv’’ sedam, ‘‘suzdržana’’ su bila dva. Zbog nedostatka entitetske većine, provedeno je usaglašavanje u Kolegiju kao komisiji i nije bilo saglasnosti. U drugom krugu glasanja, ‘‘za’’ Prijedlog zakona glasala su 23 poslanika, ‘‘protiv’’ osam – svi iz RS-a, ‘‘suzdržala’’ su se dva poslanika.

Predsjedavajući je konstatirao da ‘‘protiv’’ nije bilo dvije trećine iz entiteta, te da je Prijedlog zakona usvojen u prvom čitanju.

Ad. 6. Prijedlog zakona o genetski modificiranim organizmima (prvo čitanje)

Predsjedavajući Lozančić dao je kratke uvodne napomene o Prijedlogu ovog zakona.

Direktor Agencije za sigurnost hrane BiH Sejad Mačkić podnio je Domu obrazloženje Prijedloga zakona.

U raspravi su učestvovali poslanici: Jovan Todorović, Beriz Belkić, Velimir Jukić, Bajazit Jašarević, Milorad Živković, Martin Raguž, Ekrem Ajanović, Šefik Džaferović, Azra Alajbegović, Selim Bešlić, Husein Nanić, Jozo Križanović i Bakir Izetbegović. U vezi s raspravom ponovo je govorio Sejad Mačkić.

Prilikom glasanja, na nastavku sjednice, predsjedavajući je podsjetio poslanike da je Martin Raguž u raspravi predložio zaključak: **‘‘da se prije izjašnjavanja o principima Prijedloga zakona u prvom čitanju održi javna rasprava, u koju će biti uključeni relevantni eksperti, kako bi se**

argumentirano moglo odlučiti o svim važnim aspektima ovog zakona". Međutim, u skladu s članom 114. Poslovnika, prvo se treba izjasniti o Prijedlogu zakona u prvom čitanju, rekao je predsjedavajući, pa je proveo glasanje.

“Za” Prijedlog zakona glasala su 23 poslanika (iz Federacije BiH 20, iz RS tri), šest poslanika glasalo je “protiv”, četiri su se “suzdržala”). Kako nije bilo entitetske većine, odmah je provedeno usaglašavanje u Kolegiju. Nije bilo saglasnosti. U drugom krugu glasanja “za” Prijedlog zakona glasala su 22, “protiv” sedam (iz Republike Srpske šest), “suzdržala” su se četiri poslanika.

Predsjedavajući je konstatirao da je Prijedlog zakona usvojen u prvom čitanju.

Zatim je predsjedavajući dao na glasanje prijedlog zaključka Martina Raguža.

Sa 32 glasa “za” (Federacija BiH 22, RS 10), usvojen je zaključak Martina Raguža, koji je revidiran s obzirom da je Prijedlog zakona usvojen u prvom čitanju, a koji glasi:

“O Prijedlogu zakona o genetski modificiranim organizmima bit će održana javna rasprava, u koju će biti uključeni relevantni eksperti, kako bi se argumentirano moglo odlučiti o svim značajnim aspektima ovog zakona”.

Ad. 7. Prijedlog zakona o Agenciji za razvoj informacionog društva BiH (prvo čitanje)

Poslije uvodnih napomena predsjedavajućeg, u ime predlagača, Prijedlog zakona obrazložio je Željko Knežević, pomoćnik ministra komunikacija i prometa BiH, zadužen za oblast elektronskih komunikacija i razvoj informacionog društva u BiH.

U raspravi su učestvovali: Milorad Živković, Momčilo Novaković, Husein Nanić i Branko Dokić.

Prilikom glasanja na nastavku sjednice, Prijedlog ovog zakona nije dobio entitetsku većinu – “za” je glasalo 26 (Federacija BiH 22, RS četiri), “protiv” šest, “suzdržala” su se dva poslanika. Nakon usaglašavanja u Kolegiju kao komisiji (nije bilo saglasnosti), u drugom krugu glasanja “za” Prijedlog zakona glasalo je 25, “protiv” šest (svi glasovi protiv iz RS-a), “suzdržala” su se tri poslanika.

Predsjedavajući je konstatirao da iz entiteta nije bilo 2/3 “protiv” te da je Prijedlog zakona usvojen u prvom čitanju.

Poslije rasprave o ovoj tački, predsjedavajući je podsjetio na najavu na početku sjednice da će se danas raditi do 17 sati, pa je na glasanje dao prijedlog – **da se nastavak sjednice održi 7. oktobra 2008., s početkom u 10 sati.**

Sa 23 glasa “za” (Federacija BiH 16, RS sedam) i dva “protiv”, usvojen je ovaj prijedlog.

Sjednica je prekinuta u 17,10 sati.

NASTAVAK 35. sjednice održan je 7. oktobra 2008., s početkom u 10,20 sati. Prisustvovala su 34 poslanika. Odsustvo sa sjednice opravdali su: Beriz Belkić, Mirko Okolić, Hadži Jovan Mitrović, Azra Alajbegović, Sead Jamakosmanović, Zlatko Lagumdžija, Rifat Dolić i Sadik Ahmetović.

Iz Vijeća ministara BiH prisustvovali su ministar Tarik Sadović i zamjenici ministara Fuad Kasumović i Srđan Arnaut.

U uvodnim napomenama predsjedavajući je podsjetio da je sjednica prekinuta nakon realizacije 7. tačke dnevnog reda, kao i da je, nakon jednog dijela rasprave o 5. tački, prekinuta rasprava zbog odsustva ovlaštenog predstavnika predlagača i zaključeno da će rasprava biti nastavljena kada on bude prisutan. Kako nije bilo ovlaštenog predstavnika predlagača ni na početku nastavka sjednice, nastavljen je rad prelaskom na 8. tačku.

Ad. 8. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (prvo čitanje)

Uvodne napomene o Prijedlogu zakona podnio je predsjedavajući Doma Niko Lozančić.

Zamjenik ministra finansija i trezora BiH Fuad Kasumović podnio je Domu obrazloženje zakona.

U raspravi su učestvovali: Velimir Jukić, Branko Dokić, Momčilo Novaković, Selim Bešlagić, Jerko Ivanković Lijanović, Sadik Bahtić, Slavko Jovičić, Šefik Džaferović, Milorad Živković, Bajazit Jašarević, Bakir Izetbegović, Niko Lozančić, Vinko Zorić, Azra Hadžiahmetović, Jozo Križanović i Savo Erić. Nakon rasprave poslanika, ponovo je govorio zamjenik ministra Fuad Kasumović.

U raspravi Klub poslanika SDA predložio je zaključke u četiri tačke kojima se, uz ostalo, tražilo i odgađanje izjašnjavanja o Prijedlogu zakona, ali su prilikom glasanja zaključci povučeni.

Nakon što je Klub poslanika SDA odustao od zaključaka, predsjedavajući je na glasanje dao Prijedlog zakona u prvom čitanju.

„Za” je glasalo 20 poslanika (Federacija BiH 17, RS tri), „protiv” 10, „suzdržala” su se tri poslanika. Zbog nedostatka entitetske većine, provedeno je usaglašavanje u Kolegiju i nije postignuta saglasnost.

U drugom krugu glasanja „za” Prijedlog zakona glasalo je 19, „protiv” devet, pri čemu iz Republike Srpske sedam, „suzdržalo” se pet poslanika.

Predsjedavajući je konstatirao da je Prijedlog zakona usvojen u prvom čitanju jer u drugom krugu „protiv” nije glasalo 2/3 poslanika iz entiteta.

Zatim je predsjedavajući na glasanje dao zaključak koji je u raspravi predložio Branko Dokić, a koji glasi:

„Predstavnički dom Parlamentarne skupštine BiH preporučuje vladama Republike Srpske i Federacije BiH da se svim štedišama stare devizne štednje, čiji je iznos štednje veći od 3.000 KM, isplati jednokratna isplata u iznosu od 3.000 KM, kao pomoć za rješavanje egzistencijalnih životnih pitanja. Štedišama sa iznosom manjim od 3.000 KM da se isplati kompletan iznos njihove devizne štednje.“

Ovaj prijedlog zaključka nije usvojen. "Za" je glasalo sedam, "protiv" 15, "suzdržalo" se 12 poslanika.

Ad. 9. Prijedlog zakona o izmjeni Zakona o klasifikaciji djelatnosti u BiH (prvo čitanje)

Predsjedavajući Niko Lozančić je, nakon što je dao uvodne napomene o Prijedlogu zakona iz ove tačke, konstatirao da nije prisutan predstavnik predlagača Zakona, pa je pozvao Dom da se izjasni da li će se voditi rasprava. Dom je odlučio da se prekine rasprava o ovom prijedlogu zakona zbog odsustva predstavnika predlagača. Za raspravu bez prisustva predlagača glasalo je 12 (iz RS jedan), protiv osam, uzdržao se jedan poslanik.

Ad. 10. Prijedlog zakona o izmjenama Zakona o krivičnom postupku BiH, predlagač: Ustavnopravna komisija (prvo čitanje)

Predsjedavajući je dao osnovne uvodne napomene.

Nije bilo rasprave.

Prilikom glasanja, Prijedlog zakona usvojen je u prvom čitanju. „Za” glasao 31 poslanik (iz Federacije BiH 20, iz RS 11), „suzdržala” su se dva poslanika.

Ad. 11. Prijedlog zakona o izmjenama i dopunama Izbornog zakona BiH, s Mišljenjem Ustavnopravne komisije, predlagač: poslanik Jerko Ivanković Lijanović

Poslije uvodnih napomena predsjedavajućeg, Jerko Ivanković Lijanović podnio je kratko obrazloženje u svojstvu predlagača.

U ime Ustavnopravne komisije govorio je predsjedavajući Šefik Džaferović.

U raspravi je učestvovao Momčilo Novaković.

Sa 27 glasova "za" (Federacija BiH 18, RS devet), dva "protiv" i tri "suzdržana", usvojeno je Mišljenje Ustavnopravne komisije, pa time Prijedlog zakona iz ove tačke nije usvojen.

Ad. 12. Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008.

Predsjedavajući Lozančić podnio je uvodne napomene o Izvještaju i posebno skrenuo pažnju na Mišljenje nadležne Komisije za odbranu i sigurnost, koja domovima Parlamentarne skupštine BiH, uz ostalo, predlaže da Izvještaj usvoje bez dijela tačke 7. koji se odnosi na odlučivanje o novim misijama pripadnika Oružanih snaga BiH u Afganistanu „ISAF“ i u Sudanu „UNAMID“ – kao u Mišljenju, te dijela tačke 8. koji se odnosi na odlučivanje o novoj misiji policijskih službenika u Sudanu „UNAMID“, kao u Mišljenju. Podsjetio je i na zaključak koji Komisija predlaže domovima na usvajanje.

U kraćoj raspravi učestvovali su Momčilo Novaković i Šefik Džaferović.

Prilikom glasanja, sa 30 glasova "za" (Federacija BiH 20, RS 10) i četiri "suzdržana", Dom je usvojio Izvještaj o učešću pripadnika Oružanih snaga, policijskih i državnih službenika Bosne i Hercegovine u operacijama podrške miru za period od 1.9.2007. do 29.2.2008., s Mišljenjem nadležne komisije o ovom izvještaju, tj. u formi u kojoj je predložila Komisija za odbranu i sigurnost, sa sljedećim zaključkom:

Budući da je Izvještaj ponovo dostavljen uz znatno kašnjenje, izražava se nezadovoljstvo činjenicom da nadležne institucije ne poštuju rokove za izvještavanje institucija, što je neophodno promijeniti u narednom periodu, tako što će za svaki izvještajni period biti obavezno dostavljanje izvještaja u parlamentarnu proceduru u roku od 60 dana nakon njegovog isteka.

"Za" Izvještaj, s Mišljenjem nadležne komisije i zaključkom, glasalo je 30 (Federacija BiH 20, RS 10), a "suzdržala" su se četiri poslanika.

Ad. 13. Godišnji izvještaj o napretku (praćenje provođenja Akcionog plana 1 Strategije reforme javne uprave u BiH - materijal Vijeća ministara BiH)

U uvodnim napomenama predsjedavajući je podsjetio na zaključke koje je u Mišljenju o ovom materijalu predložila Ustavnopravna komisija.

Predsjedavajući Ustavnopravne komisije Šefik Džaferović govorio je u ime Komisije.

U ime podnosioca Godišnjeg izvještaja obrazloženje je podnijela Nevenka Savić, koordinatorica projekta za reformu javne uprave.

U raspravi su učestvovali Husein Nanić i Ekrem Ajanović. Nevenka Savić odgovorila je na pitanja postavljena u raspravi.

Prilikom glasanja Dom je, sa 28 glasova "za" (Federacija BiH 18, RS 10) i šest "suzdržanih", primio k znanju Godišnji izvještaj iz ove tačke i usvojio Mišljenje Komisije sa zaključcima predloženim u Mišljenju, koji glase:

- 1. Potrebno je inicirati održavanje sjednice Koordinacionog odbora za ekonomski razvoj i evropske integracije s ciljem rješavanja utvrđenih problema, osiguranja daljnijeg koordiniranog pristupa i nastavka političke podrške provođenju reformskih mjera (u skladu sa Zajedničkom platformom o principima i metodi primjene Akcionog plana 1 Strategije reforme javne uprave u BiH);**
- 2. Od institucija i organa uprave na nivoima obuhvaćenim Strategijom reforme javne uprave zahtijeva se viši stepen saradnje i odgovornosti u provođenju reformskih mjera, razmjeni i dostavljanju informacija s ciljem efikasnijeg koordiniranja i praćenja pokrenutih i ostvarenih aktivnosti;**

3. Neophodno je ojačati poziciju i ulogu koordinatora za reformu javne uprave, naročito Vlade FBiH i Vlade RS-a i unaprijediti koordinaciju ostalih struktura za primjenu mjera i aktivnosti iz Akcionog plana 1, koju čine imenovani predstavnici Vijeća ministara BiH, Vlade Federacije BiH, Vlade Republike Srpske i Vlade Brčko Distrikta BiH;
4. Potrebno je nastaviti razvijati mehanizme koordiniranja i konsultacija organa uprave svih nivoa zbog usaglašenog djelovanja prema donatorima i efikasnijeg korištenja donatorske pomoći.

Ad. 14. Prijedlog zaključaka s 10. plenarne sjednice oba doma Parlamentarne skupštine BiH, održane 30.7.2008., u vezi s realizacijom obaveza iz Sporazuma o stabilizaciji i pridruživanju

Poslije uvodnih napomena predsjedavajućeg Lozančića, u raspravi su učestvovali: Jozo Križanović, Branko Dokić, Denis Bećirović, Martin Raguž, Momčilo Novaković i Halid Genjac.

Nakon rasprave Dom je, sa 29 glasova "za" (Federacija BiH 20, RS devet), dva "protiv" i tri "suzdržana", usvojio zaključke koje je predložila Zajednička komisija za evropske integracije, koji glase:

1. Parlamentarna skupština BiH zadužuje Vijeće ministara BiH da, najkasnije u roku od 30 dana, Predstavničkom domu i Domu naroda dostavi na razmatranje Akcioni plan za provođenje obaveza iz Privremenog sporazuma i Sporazuma o stabilizaciji i pridruživanju s detaljnim mjerama, preciznim rokovima i nadležnim izvršiocima, te koje institucionalne pretpostavke treba stvoriti da se ove obaveze realiziraju.

2. Parlamentarna skupština BiH usvojiti će dio Akcionog plana koji se odnosi na provođenje dijela obaveza iz SSP-a koje su u nadležnosti institucija BiH. Parlamentarna skupština BiH poziva entitetske parlamente da usvoje Akcioni plan provođenja obaveza iz SSP-a za koje su nadležne entitetske institucije.

3. Parlamentarna skupština BiH zadužuje Vijeće ministara BiH da, najkasnije u roku od 30 dana, Predstavničkom domu i Domu naroda dostavi na razmatranje Akcioni plan za realizaciju prioriteta iz Evropskog partnerstva s BiH sa specifičnim mjerama, preciznim rokovima i konkretnim izvršiocima.

4. Parlamentarna skupština BiH zadužuje Vijeće ministara BiH da Predstavničkom domu i Domu naroda kvartalno podnosi izvještaj o realizaciji akcionih planova iz tač. 1. i 3., a ažurirani plan jednom godišnje.

5. S ciljem efikasnijeg rada i korištenja raspoloživih kadrova, oba doma PSBiH izmijenit će svoje poslovnike u smislu objedinjavanja posebnih u zajedničke komisije, gdje je to moguće, i skraćivanja zakonodavne procedure za zakone povezane s evropskim integriranjem.

6. Parlamentarna skupština BiH poziva Evropsku zajednicu da Bosni i Hercegovini, Crnoj Gori, Srbiji i Albaniji što prije dodijeli status kandidata i otvori pregovore o članstvu, što bi pospiješilo daljnje reformske aktivnosti i regionalnu saradnju i ubrzalo put ovih zemalja ka članstvu u EU.

Na prijedlog iz rasprave, Dom je, sa 31 glasom "za" (Federacija BiH 20, RS 11) i dva "protiv", usvojio i sljedeći zaključak:

Predstavnički dom poziva Dom naroda Parlamentarne skupštine BiH da osnuje ad hoc komisiju za pripremu izmjena i dopuna, kao i prečišćenog teksta Poslovnika Doma naroda, kako bi konačno usvojili izmjene i dopune poslovnika koje se tiču oba doma.

Ad. 15. Razmatranje mogućnosti za nastavljjanje procedure za imenovanje ombudsmena za ljudska prava Bosne i Hercegovine i zamjenika generalnog revizora iz bošnjačkog naroda

Predsjedavajući Doma Niko Lozančić je u uvodnim napomenama upoznao poslanike da je odžana sjednica Zajedničkog kolegija oba doma s ciljem pronalaženja rješenja za imenovanje ombudsmena za ljudska prava BiH i zamjenika generalnog revizora iz bošnjačkog naroda, nakon što u domovima Parlamentarne skupštine BiH nije donesena identična odluka. Uz ostalo, iznio je moguće opcije rješavanja ovog pitanja.

U raspravi su učestvovali: Bakir Izetbegović, Martin Raguž, Branko Dokić, Azra Hadžiahmetović, Momčilo Novaković, Šefik Džaferović, Halid Genjac i Milorad Živković.

Halid Genjac predložio je zaključke koji su kasnije u raspravi nešto revidirani, na prijedlog Milorada Živkovića.

Prilikom glasanja, ovi zaključci su usvojeni. Rezultati glasanja bili su sljedeći: "za" 19 (Federacija BiH 17, RS dva), "protiv" 13, "suzdržana" tri. Nakon usaglašavanja u Kolegiju (nije bilo saglasnosti), u drugom krugu "za" zaključke glasalo je 19, "protiv" 13, pri čemu iz Republike Srpske osam, što je manje od dvije trećine iz entiteta, "suzdržala" su se tri poslanika. Sadržaj zaključaka je sljedeći:

- 1. S obzirom da ovo pitanje nije regulirano Poslovníkom, Predstavnički dom, u skladu s članom 165. Poslovníka, pristupa postupku usaglašavanja različitih odluka Predstavničkog doma i Doma naroda o imenovanju ombudsmena i zamjenika generalnog revizora iz bošnjačkog naroda.**
- 2. U tu svrhu Predstavnički dom imenovat će po tri člana iz Doma u zajedničke komisije za usaglašavanje.**
- 3. Predstavnički dom sugerira Domu naroda da postupi na isti način.**

Ad. 16. Imenovanje člana Upravnog odbora Javnog radiotelevizijskog servisa BiH iz reda ostalih (rang-lista Regulatorne agencije za komunikacije BiH)

Predsjedavajući Lozančić dao je kratke uvodne napomene, dodajući da sjednici prisustvuje Helena Mandić u ime podnosioca rang-liste.

U raspravi su učestvovali Branko Dokić i Mehmed Suljkanović.

Prilikom glasanja prvi kandidat s rang-liste dobio je većinu – "za" je glasalo 28 (Federacija BiH 19, RS devet), "protiv" pet, "suzdržao" se jedan poslanik. Prema tome, za člana Upravnog odbora Javnog radiotelevizijskog servisa BiH iz reda ostalih imenovan je Mirko Vuković.

Ad. 17. Davanje saglasnosti za ratifikaciju:

- a) Sporazuma između Bosne i Hercegovine i Kraljevine Danske o olakšicama kod izdavanja viza.
- b) Sporazuma između Bosne i Hercegovine i Kraljevine Norveške o olakšicama kod izdavanja viza,
- c) Sporazuma između Bosne i Hercegovine, koju predstavlja Ministarstvo civilnih poslova BiH i Komonvelta Australije, koju predstavlja Ministarstvo zdravlja, vezano za određena prava korištenja AR-DRG sistema klasifikacije,
- d) Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske za 2007. godinu na osnovu instrumenta za pretprijetnu pomoć – Komponenta II prekogranična saradnja,
- e) Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije za

2007. godinu na osnovu instrumenta za pretpristupnu pomoć – Komponenta II prekogranična saradnja,
- f) Sporazuma o finansiranju između Bosne i Hercegovine i Komisije Evropskih zajednica u vezi s nacionalnim programom za 2007. godinu u sklopu instrumenta za pretpristupnu pomoć – Komponenta za pomoć u tranziciji i izgradnji institucija,
 - g) Konvencije o dostavljanju u inozemstvo akata u građanskim i trgovačkim stvarima - Hag 15. snovembra 1965.godine,
 - h) Konvencije o pribavljanju u inozemstvu dokaza u građanskim i trgovačkim stvarima - Hag 18. marta 1970.godine,
 - i) Sporazuma o izmjenama i dopunama broj 1. na Ugovor o zajmu od 1. avgusta 2006. između BiH i Evropske banke za obnovu i razvoj – Projekat upravljanja zračnim saobraćajem,
 - j) Sporazuma o zajmu, finansiranju i projektu između KfW Frankfurt na Majni i Bosne i Hercegovine, Federacije BiH i Elektroprivrede Hrvatske zajednice Herceg Bosne (EP HZB) – Obnova Hidroelektrane Rama.

U uvodnim napomenama predsjedavajući je podsjetio da je Komisija za vanjske poslove dostavila pozitivno mišljenje za sve akte iz ove tačke i predložila Domu davanje saglasnosti za njihovu ratifikaciju.

U raspravi su učestvovali: Slavko Jovičić, Husein Nanić i Arza Hadžiahmetović.

Prilikom glasanja, sa 32 glasa "za" (Federacija BiH 23, RS devet) i jednim "suzdržanim", Dom je dao saglasnost za ratifikaciju sporazuma i konvencija iz ove tačke.

Ovim je realiziran dnevni red sjednice.

Nastavak sjednice završen je 7. oktobra u 17,15 sati. Sljedeći nastavak sjednice, u okviru kojeg je provedeno glasanje o materijalima iz usvojenog dnevnog reda, održan je 8.oktobra 2008., s početkom u 10,10 sati.

Sastavni dio Zapisnika je transkript 35. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVALJUĆI
PREDSTAVNIČKOG DOMA
Niko Lozančić